


Nafasi ya Biblia



SABATO MCHANA

Somo la Juma Hili: *Omb. 3:22, 23; 2 Tim. 3:15-17; Yohana 17:17; Efe. 1:13; Zab. 119:11; 1 Kor. 2:14.*

Fungu la Kukariri: “Maana Neno la Mungu li hai, tena lina nguvu, tena lina ukali kuliko upanga uwao wote ukatao kuwili, tena lachoma hata kuzigawanya nafsi na roho, na viungo na mafuta yaliyomo ndani yake; tena li jepesi kuyatambua mawazo na makusudi ya moyo” (*Ebr. 4:12*).

Biblia. Sina shaka unayo nakala lau moja au pengine nakala nyingi.

Katika historia yote, kitabu hiki chenye thamani kimenakiliwa kwa siri, kimesafirishwa kisiri, na kupigwa marufuku. Ni kitabu kilichochapishwa kwa wingi zaidi ulimwenguni, katika lugha yoyote, na pia moja ya vitabu vikongwe zaidi. Baadhi ya watu wamekufa ili kuilinda Biblia.

Biblia iko wapi maishani mwako? Je, unaisoma au huwa inakaa tu kando ya kitanda chako kwenye kasha la vitabu ikikusanya vumbi? Je, maisha yako yana shughuli nyingi sana kiasi cha kutokukupatia muda wa kujifunza Neno la Mungu au unajisikia kuchoka sana kiasi cha kutoweza kufungua kurasa zake?

Neno la Mungu li hai nalo lina nguvu, na Mungu anakuita ili uiruhusu inene moyoni mwako, kukutia moyo, kukupatia changamoto na kukubadilisha, na kukupatia mwongozo na matumaini.

Biblia si tu kitabu cha kitaaluma au mkusanyiko wa visa vya kale. Badala yake, ni taarifa nzuri, ya kina kabisa ya jinsi Muumba wa ulimwengu anavyojitahidi kutuvuta karibu na Yeye. Ikiwa unatamani kukua katika uhusiano wako na Mungu, jambo lililo bora kabisa uwezalo kufanya ni kujisalimisha katika kutumia muda ulio bora pamoja Naye kila siku katika maombi, kusoma Neno Lake lililovuviwa, na kusalimisha nia yako kwa kile Neno linachofundisha.

**Jifunze somo la juma hili kwa maandalizi ya Sabato ya Aprili 25.*

Silaha Yenye Nguvu Zaidi

Kabla ya kuchunguza kwa nini Biblia ni ya thamani sana na jinsi ya kuchimba zaidi katika mafunzo yetu binafsi ya Biblia, ni lazima tuelewe jambo fulani: Mojawapo ya mashambulizi makubwa zaidi ambayo Shetani anaweza kufanya juu yako ni kukuzuia kutumia wakati pamoja na Mungu katika Neno Lake. Kuwaweka watu mbali na Biblia zao kupitia biashara, kutojali, uchovu, au mashaka ni mkakati wake wa kwanza. Ibilisi anajua kwamba tunapotumia muda pamoja na Mungu katika Neno Lake, litahisha maisha yetu na kulisha nafsi zetu, kwa hiyo bila shaka atafanya kila kitu kuzuia hili!

Tunaambiwa kwamba “Shetani anatumia kila njia inayowezekana kuzuia watu wasipate ujuzi wa Biblia; kwa kuwa maneno yake ya wazi yanafunua uongo wake.”—Ellen G. White, *Pambano Kuu*, uk. 448. Shetani anajua kwamba Neno la Mungu lenye nguvu humfanya asiwe na nguvu. Shetani anajua kwamba maombi na kujifunza Biblia ndizo silaha zenye nguvu zaidi ambazo wanadamu wanaweza kutumia dhidi yake (*Efe. 6:17, 18; Ebr. 4:12*), kwa hiyo anafanya yote awezayo ili kutuzuia tuisome Neno la Mungu na kuomba. Anajua kwamba maneno ya Mungu yana nguvu na kwamba hayakuitamka tu dunia hii hadi ikawepo (*Zab. 33:6*), lakini yanaweza kufufua wafu (*Yn. 11:41–44*) na kutupatia nguvu za kushinda (*Mt. 4:1–11*).

Kwa kuwaweka watu wa Mungu mbali na Biblia zao, Shetani anaathiri si uhusiano wetu pamoja na Mungu tu bali pia uhusiano wetu pamoja na wengine. Ndoa zetu huwa na matatizo, tunawafokea watoto wetu, na hatuna subira na marafiki au wafanyakazi wenzetu. Maisha yanaonekana kuwa na shughuli nyingi; tunahisi msongo na kulemewa, bila njia ya mahali pa kukimbilia. Cha kushangaza ni kwamba mara nyingi hatusiti ili kutambua kinachoendelea. Tunaweza kufikiri kwamba tuko karibu na Mungu, lakini kwa kweli, siku zinazopita na majuma yanapopita bila kufungua Neno la Mungu, tunadhoofika zaidi kila siku.

Hata tunapokuwa na uhusiano usiodumu na usio na mtiririko mzuri na Mungu, Mungu yu thabiti ajabu, kama Maombolezo 3:22, 23 inavyotuambia. Unaona nini katika aya hizi, na zinalinganishwa vipi na asili zetu za kibinadamu?

Kama kerubi afunikaye kabla hajaanguka (*Eze. 28:14–17*), Lusifa alisikia maneno ya Mungu na alijua uwezo wao wa ajabu. Sasa anachukia ukweli huu, kwa hiyo ni wazi kwa nini akili zetu zinakufa ganzi na mioyo yetu inatiwa utusitisi wakati hatuchagui kusikia na kuleta maneno ya Mungu katika maisha yetu ya kila siku.

Je, wewe una wasiwasi kiasi gani au huna msimamo katika maisha yako ya ibada? Je, jibu lako linapaswa kukuambia nini kuhusu kufanya mabadiliko fulani, kama yanahitajika?

Maandiko, Mamlaka

Mamlaka na kazi ya Biblia imetangazwa waziwazi ndani ya kurasa zake. Soma na unakili 2 Timotheo 3:15–17. Zingatia kile ambacho mistari hii inakuambia kuhusu kazi ya Biblia.

Inapokuja kwa katika mafunzo binafsi ya Biblia, ni lazima tuwe waangalifu tusitazamie Biblia kutimiza makusudi au maoni yetu, ambayo si wakati wote yanapelekana na ya Mungu. Kwa mfano, hatupaswi kutumia njia ya “kufunga macho yangu na kuelekeza kwenye fungu,” kwa sababu hii sivyo Mungu anataka kuwasiliana nasi kupitia Neno Lake. Mungu si kikaragosi kwenye kamba, anayesubiri kutumikia mahitaji na mapenzi yetu. Njia Zake na mawazo Yake ni ya juu sana kuliko yetu (*Isa. 55:9*), na hivyo tusijaribu kamwe kudhibiti maneno Yake kwetu. Wala hatupaswi kuchagua na kubagua tu sehemu za Biblia ambazo tunajisikia vizuri tunapozisoma. Badala yake, tunapaswa kuiona Biblia katika ujumla au katika ukamilifu wake badala ya kusoma vifungu rahisi, vinavyojulikana na kuacha vile vinavyotukabili au vyenye kutupatia changamoto. Ikiwa kwa kweli tunataka Mungu azungumze katika maisha yetu, ni lazima tuchukue Biblia katika ujumla wake na kutumia njia zinazofaa tunaposhiriki katika mafunzo ya Biblia kwa uangalifu, tukitumaini kwamba Mungu atafunua kile tunachohitaji kusikia tunapohitaji kuisikia.

Vilevile, Bwana Yesu Mwenyewe anatuambia: “Mpende Bwana Mungu wako kwa moyo wako wote, na kwa roho yako yote, na kwa akili zako zote” (*Mt. 22:37*). Yaani, Mungu hataki tupuuzie mawazo yetu; badala yake, anataka kujaza akili zetu kwa wingi wa maarifa na ufahamu, ambavyo vimedhihirishwa, kwa sehemu, kupitia katika Neno Lake. Tunaweza kusoma maelezo mengi ya kibiblia ambamo Mungu alikuwa na mijadala na watu kama vile Henoko, Ibrahimu, Musa na Ayubu, ukiongezea kwa mijadala mingi ambayo Yesu aliifanya na watu. Mungu haruki mantiki za kibinadamu bali anatualika tuzisalimishe kwa Neno na hekima Yake anapotendea kazi wokovu wetu.

Hata hivyo, mantiki ya kibinadamu, bado inao uwezekano wa kuwa na makosa ya kibinadamu na udanganyifu. Kamwe haina ukamilifu. Inawezekana kulingana na mantiki ya kibinadamu kumweka Mungu pembeni kujaribu kufanya mambo peke yetu, jambo linaloweka nafsi kuwa sawa na, au juu kuliko, Mungu inapokuja katika kufikiri. Watu wanaweza kuyakabili Maandiko wakiwa na roho ya kiburi na ya ukosoaji, wakidhani kwamba wamewahi kuyajua yote kabla na kwamba hakuna jipya kwao. Ni pale tunapojisikia kuwa wenye umuhimu sana, wenye ujasiri, kuridhika nafsi, na tukiwa hatuna hitaji la chochote ndipo tunapopuuzia uhusiano wetu na Mungu na kutegemea ujuzi wetu mdogo ulio na ukomo pamoja na mantiki zetu zenye makosa.

Ukweli wa Biblia

Kulikuwa na mwelekeo miongoni mwa baadhi ya wanateolojia huria katika miaka ya 1960 wa kumtoa Mungu nje ya uwanja wa teolojia. Mnamo mwaka wa 2017, makala kuu ya gazeti la Time la nchini Marekani ilikuwa na kichwa “Je, Ukweli Umekufa?” Kilivutia kwa sababu mwelekeo huo unaonesha msimamo wa jamii yetu leo. Wazo lenyewe la “ukweli” wenyewe linaharibika kiasi kwamba hakuna anayejua ukweli hasa ni nini tena. Kulingana na utamaduni unaotawala leo, hakuna kijiti cha kupimia, hakuna msingi unaobaki bila kubadilika na unaoweza kutegemewa kustahimili mtihani wa wakati. Kinyume na hili, Yesu alisema, “Mimi ndimi . . . kweli” (Yohana 14:6). Neno Lake hushuhudia juu Yake kama ukweli katika usafi kamili.

Soma aya tatu zifuatazo taratibu, na kisha uzisome tena kwa mara nyingine. Unatambua nini kuhusu ujumbe huu?

Yohana 17:17 _____

Mithali 30:5, 6 _____

Zaburi 12:6 _____

Biblia inatamka kwamba ukweli msingi, Yesu Mwenyewe, haubadiliki (Ebr. 13:8). Wakati huo huo, tunaposoma Neno la Mungu, uelewa wetu wa Mungu na kweli Yake unaweza kukua. “Kuna migodi ya ukweli ambayo bado haijagunduliwa na mtafiti mwenye bidii.” – Ellen G. White, Testimonies for the Church, gombo la 5, uk. 704. Katika kuunena “ukweli,” Ellen G. White alirejea daima kwenye ukweli kama ulivyotolewa na Mungu kupitia katika Neno Lake. Tunaweza kuchunguza ili kupata nuru ya ziada kwenye Biblia kwa sababu kamwe Biblia haikinzani na ukweli wa wakati uliopita, ila badala yake inajenga kila sehemu ya ukweli huo.

Soma 1 Wathesalonike 2:13; Zaburi 33:4, 5; na Waefeso 1:13. Tunapata ujumbe gani hapo?

Hatimaye, ni kwenye Biblia, na ni kwenye Biblia pekee, sharti pawe ndipo lilipo chimbuko la msingi la kile tunachokielewa kuwa ndiyo kweli. Vyanzo vingine vyote sharti vijaribiwe na Neno la Mungu. Hata kile tunachokiona kuwa ndiyo “mantiki” sharti kipimwe na Neno la Mungu.

Baadhi ya watu wanataka kukanusha kwamba hakuna ukweli mahsusi. Kwa nini kauli hiyo inajipinga? Yaani, kwa nini kudai kwamba hakuna ukweli ni jaribio la kutangaza ukweli, na ambalo linakuwa la kujikanusha?

Madai ya Biblia

Ni nini kinachoweza kubadilika katika nyumba yako ikiwa utaigeukia Biblia unapokabiliana na uamuzi mkubwa, tatizo la uhusiano, au changamoto yoyote? Je, ni nini kinachoweza kubadilika katika eneo lako la kazi au kanisa ikiwa maneno ya Biblia kwa kweli yangekuwa lenzi ambayo kwayo watu wangeutazama ulimwengu na kuchagua kuishi kwa hayo?

Daudi anatoa ushauri gani kwenye Zaburi 119:11, unawezaje kuufuata? (*Taz. pia Ebr. 4:12*)

Moja ya madai ambayo Biblia inatoa kujihusu yenyewe yanaweza kupatikana katika Waebrania 4:12. Upanga wenye makali kuwili una nguvu na ni mkali, lakini Biblia inaweza kufanya kile ambacho zana za kibinadamu haziwezi kufanya kwa ajili ya nafsi ya mwanadamu. Biblia inajieleza yenyewe kuwa hai. Pengine umejiuliza jinsi gani hili linaweza kutokea, ikizingatiwa kwamba iliandikwa maelfu ya miaka iliyopita, lakini Yesu alisema, “maneno hayo niliyowaambia ni roho, tena ni uzima” (*Yohana 6:63*). Ikiwa moyo wako umevunjika au maisha yako yanasambaratika, Mungu anaweza kusema maneno Yake katika ulimwengu wako na kubadilisha mambo. Agano la Kale pia linaelezea maneno ya Mungu kuwa yanatenda kazi sana na kamwe hayadodi au kukaa tu (*taz. Isa. 55:11*). Daudi alipotafakari juu ya matokeo ya maneno ya Mungu katika maisha yake, aliandika, “Hii ndiyo faraja yangu katika taabu yangu, ya kwamba ahadi yako imenihuishia” (*Zab. 119:50*).

Pengine umepitia uzoefu wa njaa ya kutisha wakati fulani maishani mwako, au pengine umekuwa katika kufunga au umepunguza milo kwa sababu za kiafya. Je, huhisi ladha nzuri ya chakula baada ya kuwa na njaa? Kiroho, Biblia ni chakula kwa ajili ya nafsi zetu.

Ikiwa roho yako iko tupu na ina njaa, fungua Neno lililo hai. Soma Yeremia 15:16; 1 Petro 2:2 na Mathayo 4:4. Maneno ya Mungu huwa yana ladha nzuri akilini na moyoni, na pale tunapoyasoma, yatatushibisha na kutuendeleza kama ilivyoahidiwa.

Maneno kwenye Biblia yetu yametoka kwa Mungu Mwenyewe. Mungu aliyatuma mahsusi kwa ajili yetu na kwa ajili ya kila mtu ambaye amemtafuta Yeye. Tunapoyasoma kwa moyo wa maombi, ulio wazi, maneno hayo hayawezi kupotezwa.

Ni mambo gani magumu unayopambana nayo sasa maishani mwako ambayo Biblia inayazungumzia? Kwa nini ni lazima usiruhusu nafsi ikuzuie kufuata kile Biblia inachokwambia?

Hali ya Moyo

Uwezo wetu wa kupokea maelekezo ya Neno la Mungu (*Ayubu 22:22*) unategemea kwa kiasi kikubwa namna hali ya moyo wetu ilivyo tunapojia Biblia. 1 Wakorintho 2:14 inaliezeaje hili?

Kuwa na utambuzi wa kiroho kunamaanisha kuwa na ufahamu wa kiroho na uelewa. Hivyo basi inaleta maana kwamba mtu aliye na nia ya kiroho iliyofunguka ataelewa mambo kwa namna tofauti sana asomapo Biblia kuliko mtu ambaye nia yake imefungika. Mtu anayefikiri kwamba Biblia ni upumbavu hatatafuta ukweli katika kurasa zake.

Kwa hivyo, mtazamo kwa Biblia na jinsi tunavyoisoma ni muhimu sana kuhusiana na suala la kukua katika uhusiano na Mungu. Je, Paulo anaelezeaje jambo hili katika 1 Wathesalonike 2:13?

Neno la Mungu linatenda kazi ndani yetu tunapoamini. Unapoifungua biblia yako na kuamini kwamba Mungu analo jambo la kukuambia kupitia katika maneno ya kurasa zake, hakika atanena nawe na kutenda maishani mwako. Lakini kwa kiasi kikubwa hivyo, hilo linategemea imani yako na matarajio yako. Habari njema ni kwamba ikiwa imani yako ni ndogo, Mungu anaweza kusaidia katika kuikuza (*Marko 9:24*), hata ikiwa ni ndogo kama punje ya haradali (*Luka 17:6*).

Moja ya makusudi makuu ya Biblia ni kunena ukweli maishani mwetu kuhusu hali ya uhusiano wetu na Mungu na jinsi ya kuuimarisha. Kama moyo wako uko wazi kwa Roho Mtakatifu, unapolikabili Neno kwa unyenyekevu, daima utatoka ukiwa umebadilishwa, ingawa mtu anaweza asitambue hili siku kwa siku, kwani badiliko la namna hii na ukuaji mara kwa mara huwa kwa namna ya kuongezeka. Lakini ikiwa tutang'ang'ania hali yetu ya kutojali na dhambi na hatuko radhi kubadilika, usomaji wa Biblia hautatupatia manufaa sana. Roho Mtakatifu anatusukuma tusogee karibu zaidi na Yesu Kristo. Je, tunataka kusogea karibu zaidi? Ikiwa ndivyo, tunakuwa "tumehikimishwa hata upate wokovu" (*2 Tim. 3:15*), nasi tutaona mambo ambayo kamwe hatukuwahi kuyawaza.

Je! Huwa ninakuwa katika hali gani ya moyo na akili yangu ninapojia Biblia? Je, ninaleta tu maoni yangu kwa Biblia kwa lengo la kujaribu kuyahalalisha, au ninakuja nikiwa na akili na moyo wazi, tayari kwa imani kama ya mtoto mdogo kuona kile ambacho Mungu anataka kuniambia leo? Kwa nini jibu hilo ni muhimu sana?

Jifunze Zaidi: Kama ukitafakari maneno ambayo umeyasema kwa saa 24 zilizopita, ungeyatathminiye? Je, yalikuwa ya upendo, mema, ya furaha, yanayoinua, yaliyoonesha kuvunjika moyo, kuchoka, kufadhaika, hasira, usengenyaji, au yenye kijicho na nia mbaya? Biblia inasema, “Kinywa cha mtu huyanena yaujazayo moyo wake” (Mt. 12:34). Tukiwa na takataka mioyoni mwetu, huwa ndizo zitokazo katika maneno yetu.

Sote tumepitia hisia za kufadhaika, uchovu, au msongo, na hali hiyo ya akili hubadilisha kile kinachotoka midomoni mwetu (mara nyingi maneno ambayo tunayajutia baadaye). Kinyume chake, wakati mioyo yetu inapojaa upendo kwa ajili ya mtu fulani, huo hutiririka kupitia katika maneno yetu.

Kwa namna hiyo hiyo, Neno la Mungu linanena juu ya moyo Wake na makusudi Yake kwa ajili yetu. Inashangaza kufikiria kwamba maneno haya haya, yanayotoka moja kwa moja kwenye moyo wa Mungu, tunayo viganjani mwetu kwenye Biblia. Ni jambo la kushangaza kweli kuona nguvu ya maneno ya Mungu ilivyo tawala kwenye historia yote.

“Ni jambo moja kuichukua Biblia kama kitabu chenye mafundisho ya maadili mema, kukisikiliza pale tu linapoendana na wakati na hali yetu duniani; na ni jambo lingine kutambua neno hilo kama hakika neno la Mungu aliye hai, neno ambalo ni uhai wetu, neno lipasalo kutawala matendo yetu, maneno yetu na mawazo yetu. Kulichukulia neno la Mungu kama chochote kilicho tafouti au pungufu ya hivyo ni kulikataa. Na kulikataa huko kwa watu wanaodai kuliadini, ndicho chanzo kikuu cha kutokuadini na kukosa maadili kwa vijana.” – Ellen G. White, *Elimu ya Kweli*, uk. 211, 212.

Maswali ya Kujadili:

- 1 Ni sababu zipi zote za kimantiki na za busara ulizonazo kwa kuwa na imani uliyo nayo? Pengine ni nyingi zaidi kuliko vile unavyofikiria.
- 2 Unawezaje kuhakikisha kwamba kujifunza Biblia na maombi ni msingi wa uhusiano wako na Mungu? Unawezaje kuwa na uhusiano na Mungu bila maombi na kujifunza Biblia?
- 3 Ikiwa mtu angetaka kuimarisha uhusiano wake na Mungu, ungemshauri aanzie kusoma wapi?
- 4 Unawezaje kuishi kwa kila neno litokalo katika kinywa cha Bwana? (Kum. 8:3). Je, hilo linaweza kuonekanaje katika maisha yako?
- 5 Aya zifuatazo zinatuaambia nini kuhusu maneno ya Mungu? Ebr. 11:3; Zab. 33:6; Mt. 11:4, 5; 1 The. 4:16; Efe. 6:17; Yakobo 1:21.

Muhtasari: Biblia ni hai na ina nguvu, na kuisoma ni msingi wa kukuza uhusiano wetu na Mungu. Si tu kwamba inatufundisha kuhusu tabia ya ajabu ya Mungu na mwingiliano Wake na wanadamu katika historia yote ya dunia—pia inazungumza na kila mmoja wetu leo tunapoifikia kwa unyenyekevu.